

Radio e Televisiun Rumantscha rinforzan las regiuns

■ (cp) Radio e Televisiun Rumantscha (RTR) mettan enturn il concept da regiunalisar. En preschientscha da giasts è la redacziun regiunala Engiadina a Samedan vegnida averta uffizialmain. Il rinforzament en las autras quatter regiuns succeda en il proxim 1^{1/2} onn.

Il directori da la Cuminanza Rumantscha Radio e Televisiun e la direcziun RTR han en connex cun l'avertura da la Chasa RTR a Cuir adina punctuà che las regiuns duain restar en il center da las activitads publicisticas da RTR. Quai sper la chasa da medias en la capitala dal chantun che represchenta la Svizra rumantscha che vul vegnir vesida ed udida. Avant in onn è vegnì decidì il concept per bajegiar or las redacziuns regiunalas a Scuol, Samedan, Savognin, Glion e Mustér – sin cust da la centrala a Cuir. Cun quai s'augmentan las plazzas en las regiuns da 7,5 sin 13 posts da lavur.

Pli actual e manavel al public

Cun l'inauguraziun dal nov studio regional a

Samedan è uss realisà l'emprim dals tsching studios regiunals. Il zercladur da quest onn suonda il studio a Scuol. En omadus lieus èn staziunads redacturas e redactors da radio sco era da la televisiun. «Cun quest rinforzament vegn RTR pli manavel al public ed anc pli actual ord la regiun» di il director RTR *Bernard Cathomas*. L'atun 2008 ed il cumenzament 2009 vegnan ils studios da correspundents en Surselva a Mustér e Glion bajegiads or. Sin la fin da 2009 er quel dal Grischun central a Savognin.

Collavuraziun stretga cun RTSI

Las localitads a Samedan na stattan sulettamain a disposiziun a Radio e Televisiun Rumantscha, mabain er ad autras unitads d'interpresa da la SRG SSR idée suisse. Primarmain a Radiotelevisione svizzera di lingua italiana (RTSI), che dispona a Samedan da dus posts da lavur. In da quels è prevì da vegnir occupà permanentamain cun in correspondent RTSI.